

## Naqqiut

### Siunnersuut 18. august 2014-mik ullulerneqarsimasooq taarserpaa

#### (Oqaaseqatigiit annertunngitsumik iluarsaanneqarput taavalu aamma pisortatigoortumik ilusaanut iluarsaasoqarpoq)

**Uunga siunnersuut: Aalisarnermut aningaasaliissutitut immikkoortitat pillugit Inatsisartut inatsisaata allannngortinnissaa pillugu Inatsisartut inatsissaat**  
(Aalisarnermut, Piniarnermut Nunalerinermullu Naalakkersuisooq)

### Saqqummiussissutissaq

#### Siullermeenera

Aalisarnermut aningaasaliissutitut immikkoortitat pillugit Inatsisartut inatsisaata allannngutissaatut siunnersuut matumuuna Naalakkersuisut sinnerlugit saqqummiutissavara. Siunnersuutip kingunerisaanik angallatinik isaterinermut tapiissuteqariaatsit allannngortinneqassapput inatsisissami kapitali 6-imi takuneqarsinnaasutut.

Piginnaatitaaffiit atuuttut naapertorlugit pingaarnertut maleruagassaavoq, angallammik piginnittoq isaterinissamut tapiissutit pissarsigaangat aalisarsinnaanissamut akuersissutit atorunnaarsinneqartarmata. Tamatumunnga tunngaviuvoq inatsisip suliarinera aallartisimalaaginnalersooq isaterinissamut tapiissuteqartarnerit aalisarmi naleqqussaannissamut suliniutinut ilaatinneqarsinnaanissaa kissaatigineqarmat.

Naak taamaasiortoqaraluartooq politikkikkut kissaatigineqarsimavoq pissutsini ataasiakkaanni aalisarsinnaanissamut akuersissutit aalisartunit piginnarneqarsinnaassasut. Taamaattumik 2012-imi upernaakkut ataatsimiinnermi siunnersuutigineqarpoq aalisartut ataatsimoorlutik aalisariummik nutaamik pisinissartik kissatigigaangassuk aalisarsinnaanissamut akuersissutit piginnarneqarsinnaassasut. Siunnersuut saqqummiunneqarpoq politikkikkut soqutigisat eqqarsaatigalugit ilutigalugulu naleqqussaannermik suliani aalisariutit amerlassusaat eqqarsaatigalugit naleqqussaasoqassammat.

Misilittakkakkali naapertorlugit isaterinerit ingerlanneqartartut ikippallaarput aningaasanut inatsimmi aningaasanut immikkoortinneqarsimasunut sanilliullugit. Siunnersuutip kingunerisaanik isaterinerit ingerlanneqareernerisigut qinnuteqartut aalisarsinnaanissamut akuersissutaatik tigummiinarsinnaasavaat. Taamatut iliortoqarpoq siunnersuut aqutigalugu angallatinik amerlanerusunik isaterisoqartalersinnaanissaa naatsorsuutigineqarmat.

Siunnersuummi aaqqiissutit erseqqissaassutillu allat ilanngullugit suliarineqarput:

Inatsimmi § 14, imm. 2-mi, nr. 4 aamma 5-imi angallatit aalisarsinnaanissamut piginnatitaaffinnik minnerpaamik 50%-iinik ukiuni marlunni kingullerni aalisarsimanissaanik aammalu qinnuteqarnermi angallatit aallariaannaanissaanik aalajangersakkat peerneqarput. Piumasaqaatit taakku angallatit ukiuni kingullerni marlunni Kalaallit Nunaanni aalisarsimanissaanik piumasaqaammik taarserneqarput.

Siunnersuutip kingunerisaanittaaq angallatit pisortanit taarsigassarsinikkut tapiiffigineqarnikkulluunniit pissarsiarineqarsimasut, isaterinissamat tapiiffigineqartarsinnaassammata taarsigassarsianik tapiissutinilluunniit tunniussinermi kingullermit ukiut qulit qaangiunneranni. Taamatut ukiunik qulinik aalajangersaasariaqarneq erhvervsstøtte aqutigalugu qaqugukkut nutaanik taarsigassarsisinaanissamat maleruagassaartoqarneranik pissuteqarpoq. Taamaasiortoqarneratigut suliassaqarfimmi tassani maleruagassat naleqqussarneqarput.

Ilutigalugu qinnuteqaatinik pingaarnersiulluni tullerriaarisarnerit allanngortinneqarput, inatsimmi § 14, imm. 5 takujuk. Siunissaq isigalugu tullerriaarinerit, angallatit pisoqaassusaat angissusaallu, angallatip pisarisartagai, nunap immikkoortuisa ilaanni angallatit akuersissutillu amerlassusaat, aammalu qinnuteqartup angallammik piginnittuusimanerisa sivisussusaat aallaavigalugit ingerlanneqartalissapput.

Tapiissutigineqartut angallatip nalivia aallavigalugu suli annertunerpaaffeqartinneqassapput siunnersuummi § 15 takujuk. Taamaattorli siunissaq isigalugu naliliisarnissat akigititassamat naliliisartumit aalajangersarneqartalissapput. Akigititassanut aalajangiisartussaq Aalisarnermut, Piniarnermut Nunalerinermullu Naalakkersuisoqarfimmit toqqarneqassaaq. Tassunga aningaasartuutaasartut qinnuteqartumit akilerneqartassapput.

Siunnersuummi § 16, imm. 2 naapertorlugu, isaterinerit isaterivinni Aalisarnermut, Piniarnermut Nunalerinermullu Naalakkersuisoqarfimmit akuerineqarsimasuni ingerlanneqartassapput. Taamatut aqqissuussisoqarniarpoq isaterinerit avatangiisinut ajoqutaanngitsumik ingerlanneqartarnissaat qulakkeernerusinnaajumallugu.

Taamatut oqaaseqarlunga allannguutissatut siunnersuut Inatsisartunit akuersaartumik oqallisigineqartussanngorlugu saqqummiuppara.